

電達等語希即查照并轉省議會是盼政務會議支

唐紹儀報告向中外宣言停止和議電

衆議院鑒本日向中外宣言停止和議其文曰中華民國當世界大戰爭之際不幸而自陷於內爭者年餘軍政府鑒於人民之公論及友邦之勸告與北京政府開誠言和特派全權代表冀將國家一切根本問題澈底解決以達永久和平之鵠此物此志諒中外之所周知不幸自二月二十日開會以來會凡六次乃有理宜先決之陝西停戰與參戰軍停募之兩大事件橫生梗阻遂致所謂根本問題計議未遑蓋所議者和也和戰不能並立今一面言和一面主戰此非北京政府謀和之無誠意即其威信之不能行有一於此和必無幸查去年十一月十六日北京政府頒發停戰命令本應陝閩一律乃藉詞勦匪乘機進取致陝西人民受停戰後之痛苦者三閱月延至二月十三日始對於陝閩鄂西根據江蘇李督軍所擬五條辦法頒發停戰命令北方代表始至會議席上聲言關於十三日以後陝西停戰事件當負完全責任乃自十四日至二十一日陝西前敵日有快郵報告皆稱北軍大舉來襲東西各路失地有□三原本部且見搖動儀等要求與三原通電爲停戰之初步至今不見一電來自三原似此且戰且和儀等負有言和職責果何以

對陝民何以對天下遂於念八日午後九時提出實行停戰與撤換陝督陳樹藩兩條件限四十八小時答復屆時答復如難滿意或竟無答復則證明北京政府並無誠意和議是不得不停今限期已屆復文未至和議自明日起即無法進行北方代表已有總辭職之表示儀等才短識闇致中外想望之和平驟遭挫折深用咎心惟以軍政府酷愛和平甘居退讓及儀等委曲求全之苦衷苟非萬不得已決不願有此頓挫至參戰軍之應停募理尤顯然蓋和者不戰之謂也當此歐戰告終本會正謀大舉裁兵之始乃利用國防之名行其增兵之實蒼頭特起其意何居儀等要求宣布北京政府與日本所結軍事協約之正附各件參戰借款之條件全文凡所交到僅協定正文亦未暇議及總之和平以謀根本與去障礙二義相爲表裏脫令末之不能去尙何根本之可謀今舉步未終大爭以起凡中外之所蔽罪於儀等者俱所樂受惟於不絕如綫之國本暨水深火熱之人民公等有何良策足資挽救俾儀等得所用力以補時艱儀等不才竊願承教唐紹儀章士釗胡漢民繆嘉壽曾彥郭椿森劉光烈王伯羣彭允彝饒鳴鑾李述膺等語合行電達唐紹儀叩冬

議員陳家鼎等請慰問法首相被刺並反對北京發行八年公債電